

Text_1

Quei onn da scola ei staus ualti differentes dils davos onns. Igl emprem inaga ch'il plaz da pausa ei vegnius partius en e nus havein buca pli astgau esser ensemen cun tschels scolars. Gliez ei stau tup perquei che jeu hai era amitgas ella superiura. Denton suenter in temps sun jeu s'endisada cun quella situaziun. Tgei ch'ei era stau auter ei ch'ils scolasts han giu si mascra. Quei ei stau curios perquei che nus havein buca viu pli endretg las fatschas dils scolasts e nus havein buca adina capiu bein els. In temps suenter ch'ils scolars dalla superiura han entschiet a purtar mascra han era ils scolars dalla 5 e 6avla classa stuiu metter si mascrina. Quei ei stau in temps fetg stuffi. Denton suenter in pèr dis sun jeu s'endisada. Tgei cletg havein nus astgau prender giu la mascra suenter in pèr meins. E lu ein ils tests da corona vegni vitier. Era quei ei stau curios. Mo plaunet ei quei daventau sco ina rutina. Denton tut quei ha buc influenzau con bia che jeu e mia classa havein tuttina empriu en quei onn da scola. Sche jeu patratgel anavos vid igl onn vargau, lu stoi jeu dir che jeu hai duront il „homeschooling“ empriu bunamein aunc in tec meglier a casa ch'en scola. Jeu fuvel bugen a casa. Per l'ina hai jeu saviu durmir pli ditg e per l'autra hai jeu astgau purtar resti pli cumadeivel. Jeu hai era saviu beiber ni magliar cu jeu level. Per mei ha quei funcziunau super. Mirau sin ina vart ei ina massa stau auter uonn cun tut quei da corona. Denton mirau sin tschella vart hai jeu empriu fetg bia e tuttina ei buc aschi bia stau different. Il meglier fuss sch'il virus da corona svaness semplamein. Jeu giavischel che nus saveien gleiti puspei viver tut normal senza quei virus.

Text_2

Ei era mo ina damonda dil temps tochen che las scolas vegnien a serrar lur portas. Cu ei han lu communicau che las scolas siarien ein tuts selegrai. Duas tochen treis jamnas ditg ei quei stau bellezia. Suenter in temps eis ei vegniu pli e pli lungurus. Ils collegas muncavan ed era il s'entupar sin plaz

scola avon che la scola entscheivi e raquintar in a l'auter tgei ch'ins ha fatg la sera avon muncava – ed aunc bia auter. Ins ha era sentiu vid las prestaziuns duront il „homeschooling“ che zatgei era massivamein auter. Suenter biebein dus meins han ins puspei astgau turnar en scola. Jeu hai il sentiment che schizun quels che van in summa buc bugen a scola ein selegrai sin quei di. Las vacanzas da stad ein aunc stadas dètg normalas ed ins ha astgau e saviu far bunamein tut senza mascra.

Lu ha il niev onn da scola entschiet. All'entschatta era tut aunc pli u meins sco usitau. Igl emprem ch'il consorzi ha fatg ei stau da parter en il plaz da scola per tuttas classas. Aschia ha mintga classa giu siu territori. Miu meini ei che quei havess fatg pli bia senn sch'ins havess fatg gruppas da „cumpogns“ perquei che jeu manegel che negin hagi mess si mascra el temps liber cura ch'el ni ella ha fatg giu cun collegas. Quei dil plaz da scola ei aunc adina aschia sco all'entschatta.

En scola ei tut stau pli u meins normal. Denton in di ha ei dau ina midada. Ei ha giu num: „Damaun vegnis vus a scola cun si ina mascra!“ Ei era buc aschia che quei fuss stau zatgei niev per nus perquei che quels dalla superiura purtavan gia mascras dapi in pèr jamnas ed ei era clar che zacu tuchi ei era nus. E tuttina eis ei stau curios cu igl ei stau aschi lunsch. Quei temps fuva ualti caotics. Enzatgi haveva emblidau sia mascra, in auter haveva ella sut il nas ni schizun in summa buc si ina. Cul temps han tuts saviu s'adattar allas novas reglas. Enzacu havein nus entschiet a far tests. Ils tests ein buc nauschs perquei ch'igl ei fetg sempel da far els. Quels tests han liug ina ga ad jamna il mardis. Cuort suenter che nus havein giu entschiet culs tests havein nus era puspei astgau vegnir a scola senza mascra. Ils scolars dalla superiura denton han giu da metter si vinavon mascras. Els ha ei propi tucchau pli fetg che nus.

Text_3

All'entschatta digl onn da scola fuva sulettamein il plaz da pausa partius en. Quei fatg fuva buca fetg disavantagius mo nunecessaris damai ch'ils scolars dallas differentas classas s'entaupan suenter scola aschia ni aschia - e quei senza distanza. Pli tard han ils scolasts stiu metter si mascrinas, per ils scolars nuot pli special. Pli tard han ils scolars dalla superiura stiu purtar mascrinas. E lu eis ei era iu liber per nus. Metter si mascrinas duront scola fuss gie aunc iu mo duront sport fuva quei il horror. Ultra da quei ei ord miu punct da vesta quei cullas mascrinas gie nuot nausch mo suenter scola s'entaupan ins aschia ni aschia cun ils conscolars senza mascrina. Ord quei motiv ha quei, per mei, buca fatg grond senn. Denton propi malemperneivel eis ei daventau duront las vacanzas da sport cura ch'in commember da mia famiglia ei vegnius testaus positiv sin corona. All'entschatta dalla curontina eran tuts frustra, damai che tuts havevan plans per las vacanzas. Plaunet ei igl anim vegnius anavos e tuts selegravan che la curontina seigi gleiti vargada. Il secund davos di dalla cuorontina essan jeu e mia famiglia semess sin via a Glion tier il Point-of-care per schar testar ed aschia astgar bandunar pli baul la curontina. Deplorablamein sun jeu vegnius testaus positiv sin corona. Propi malsauns sun jeu buca staus. Mo izolaziun ei aunc bia mender che curontina. Mo per cletg hai jeu giu scola duront l'isolaziun ed jeu hai saviu far il „skypen“ cun mes conscolars ed il scolast. Aschia hai jeu buca giu memia lungurus. Suenter quels vegn dis sun jeu selegraus fetg da puspei entupar mes collegas e finalmein saver ir ord casa ed a scola ed era da buca stuer mirar igl entir di sil finistrel da miu ipad.

Text_4

Quei onn da scola ei staus tut auters che tschels onns. Il mender per mei ei stau quei temps che nus havein stuiu purtar mascra en scola. All'entschatta hai jeu buca priu aschi serius l'entira caussa, denton suenter in temps eis ei

vegniu mender e mender ed ins ha sentiu pli e pli fetg las consequenzas da quei virus. En scola havein nus stuiu dar giu ni stuschar projects ed autras caussas. In temps havein nus perfin stuiu far sport cun mascra, gliez ei stau fetg stuffi e malemperneivel per mei. Jeu quetel quei in tec curios che nus astgein buca esser ensemen cun autras classas duront pausa malgrad ch'avon ed era suenter scola ein ins savens ensemen cun quels scolars. Suenter in temps havein nus entschiet cun ils tests en scola e tut ei vegniu in tec pli luc. Nus dalla 5 e 6avla classa havein astgau schar giu la mascra en scola.

Pertuccont il „homeschooling“ sai jeu dir che jeu hai duront quei temps per dabia buca profitau aschi fetg sco en scola. Il pir per mei ei stau da stuer star persula a casa.

Text_5

Cuort suenter ch'igl onn da scola haveva entschiet ha ei giu num: Tut ils scolasts dalla superiura e lur scolars han da metter si mascrina - cuort temps pli tard era ils scolasts dalla primara.

Ei era special e malemperneivel per mei da mirar sin personas cun mascrinas. Jeu sesentivel curios - quei era buca normal per mei.

Jeu speravel che nus dalla 5 e 6avla classa stueien buca metter si mascra! Denton pauc temps pli tard ha ei giu num: Era quels dalla 5 e 6avla classa ston metter si mascrina!

Quei ei stau per mei tup e fetg malemperneivel. Vitier ei era aunc vegniu la repartiziun dil plaz da pausa. La pausa fageva buca propi plascher pli.

Silmeins astgavan ins prender giu duront quei temps in tec la mascra.

La repartiziun dil plaz da pausa hai jeu quita fetg curios! Daco stuein nus tener distanza sil plaz da pausa aber suenter, els zulers, van tuts ensemen da scala si?

Suenter in temps eis ei vegniu meglier cun las reglas da corona e nus dalla 5 e 6avla classa havein astgau prender giu la mascra.

Ussa fagein nus tests! Quei ei per mei endretg - e tuttina curios.

Text_6

Quei onn da scola ei staus fetg specials. All'entschatta hai jeu buca priu aschi serius quei virus. Jeu hai tertgau che quel seigi buca ditg cheu. Tuttina havevel jeu in curios sentiment el venter. Suenter in temps hai jeu sentiu pli e pli fetg ch'il virus da corona era cheu. Quei temps che nus havein giu da metter si mascra ei buca staus emperneivels. Duront quei temps havevel jeu era ualti savens schliet ni mal il tgau. Dapi igl onn 2020 han tuts mo pli tschintschau sur dil virus. Suenter in temps pudevel jeu buca pli udir ei. Ussa han ils biars aunc si mascra, quei disturba mei in tec e jeu sperel fetg che nus saveien spèrt puspei viver normal. Cura che nus havein giu „homeschooling“ era ei fetg lungurus. Il tup era ch'ins veseva buca la scolasta ed ils conscolars.

Text_7

Cu il virus da corona ei vegnius, ein tuts stai schoccai. Negin ha pli ughegiu dad ir ord casa. Era jeu hai reagiu aschia cu jeu hai udiu che quei virus ord la China seigi uss sederasaus sur igl entir mund.

E cu nus havein lu stuiu far „homeschooling“ sun jeu sesentida sco en ina perschun, era sche jeu hai empriu tuttina bia duront quei temps sco duront haver normal scola. Mintga damaun haiel jeu udiu il tun dil scalin da „Skype“ e quel ei ius cun mintga gada ch'ei ha scalinau pli e pli fetg sin la gnarva a mi.

Era duront quei onn da scola cheu eis ei stau fetg curios. Igl εμπрем inaga ch'il plaz da pausa ei vegnius partius en e nus havein buca pli astgau esser

cun tschels scholars. Quei ei stau fetg malemperneivel per mei perquei che jeu hai buca saviu tschintschar pli cun scholars dad autras classas. Tgei ch'ei era stau auter ei ch'ils scolasts han stuiu metter si mascra. Quei ei stau ualti curios perquei che nus havein buca viu las fatschas dils scolasts endretg e nus havein buca capiu adina bein els. In temps suenter ch'ils scholars dalla superiura han entschiet a purtar mascra han era la 5 e 6avla classa stuiu purtar mascrina. Quei ei stau in temps fetg stufi. Duront scola han ins strusch giu avunda flad ed ins era leds cu ins saveva prender giu la mascra. Denton suenter ina ni duas jamnas essan nus s'endisai. Per cletg havein nus suenter in pèr jamnas astgau prender giu la mascra. E lu ein ils tests da corona vegni. All'entschatta eis ei stau malemperneivel aber era vid quei sun jeu lu s'endisada suenter in temps. Jeu sperel ch'ei vegni gleiti puspei normal.

Text_8

Il temps a casa ei staus per mei fetg curios perquei ch'ins veseva buca pli ils amitgs e las amitgas ed ei fuva era tut auter da far pensums a casa tut persuls. Ina ga ad jammna telefonavan nus cun la scolasta sur „Skype“. Suenter circa dus meins havein nus puspei saviu far scola en scola. Il mender vid quei onn da scola ei stau per mei ch'ins stueva purtar mascra. Quei ei stau fetg malemperneivel. Nus stuevan tener distanza ed astgavan buca dar il maun en scola. Tuttina eis ei stau da tener ora. Enzacu havein nus entschiet cun far ils tests da corona. E nus havein astgau prender giu las mascras. Quei hai jeu quita fetg bien.

Text_9

Igl onn da scola d'uonn ei staus ualti differents dils davos onns. Igl εμπrem inaga ch'il plaz da scola ei vegnius partius en e nus havein buca pli astgau

esser cun tschels scolars. Tgei ch'ei stau auter ei ch'ìls scolasts han giu si mascra. Quei ei stau ualti curios perquei che nus vesevan buca endretg lur fatschas ed ins capeva els buca propi endretg. In temps suenter che quels dalla superiura han entschiet a purtar la mascra han la 5 e 6avla classa era stuiu purtar mascrina. Quei ei stau in temps fetg stuffi. Jeu havevel savens schliet e problems cul flad. Denton suenter in pèr dis essan nus s'endisai. Tgei cletg havein nus suenter entgin temps astgau prender giu la mascra. Fetg curios ei era stau ch'ìns saveva buca esser culs amitgs da pausa. Ins astgava duront pausa buca semischedar cun autras classas, da miezdi denton schon. Quei ha fatg studegiar mei fetg. Cura ch'ìgl ei stau „homeschooling“ era ei fetg cumplicau. Ei era tut auter ch'en scola. Igl ei stau fetg curios a casa, tut era aschi ruasseivel.

Text_10

Cura ch'il virus da corona ha contonschiu la Svizra eis ei buca iu ditg ch'ei ha giu num: „Naven dad ussa han ins da luvrar naven da casa ed era far scola naven da casa!“ Jeu quitavel quei all'entschatta buc aschi nausch perquei che jeu tertgavel che quella pandemia cuozi mo in, dus meins. Aber suenter in pèr jamnas era ei malemperneivel. Ins veseva buca las collegas ed ins saveva buca propi tgei far. Jeu selegravel adina sin che jeu sappi telefonar cun mias collegas. Jeu hai tuttina empriu bia a casa.

Naven dil november da quei onn da scola han ils scolasts ed ils scolars dalla superiura stuiu metter si la mascrina. Pli tard han ils scolasts dalla primara stuiu purtar mascrina e suenter nus. All'entschatta hai jeu quitau ei malemperneivel denton suenter in pèr dis sentevel jeu buca pli la mascrina. In disavantatg era ch'ìns veseva buca la mimica dils conscolars e dils scolasts. Lu han ils tests da corona entschiet ed ils scolars dalla 5 e 6avla classa han astgau prender giu la mascrina. Jeu hai quitau quei aunc ina buna idea.

Text_11

Cu ils scolasts han giu da metter si la mascra hai jeu quitaui ei curios. Jeu erel disada da veser las fatschas dils scolasts. Sche jeu fuss ina nova scolara e jeu fuss vegnida en quella scola lu savess jeu gie buca co miu scolast vesa ora. Cu la superiura ha giu da metter si la mascra hai jeu saviu ch'ei mondi buca ditg e nus hagien era da metter si la mascrina. E propi, la tschunavla e sisavla classa han era giu da metter si ella. Jeu hai quitaui quei tup e malemperneivel per quei ch'ins saveva buca co ir entuorn cun quei. Las mascras havein nus saviu prender giu cu ils tests da corona ein vegni. Per mei ei quei stau in levgiament. Finalmein giu cun las mascras!

Sco gia detg ein ils tests vegni. Per cletg havein nus mo fatg ils tests da spida. L'aua ei buca la megliera, aber bia pli bugen quels tests che quels dad ir siaden el nas. Jeu quetel quei ei meglier. Aschia havein nus saviu prender giu la mascra.

Pertuccont la curontina sai jeu tschintschar ord atgna experientscha. Jeu hai giu da star en curontina! La gronda part dil temps ei quei stau fetg lungurus!